

Nunatsinni inuussutissanik nioqqutissiornermik inuussutissarsiortunut tunngasuni, tassani ingammik inuussutissanik avammut niuerutigineqartuni pissutsinut tunngasuni, ilinniartitaanikkut neqeroorutinik amerlanerusunik ineriartortitsinissaq pillugu Naalakkersuisut UKA 17-mut nassuiaasiornissamik peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaq Sara Olsvig, Inuit Ataqatigiit)

Akissuteqaat

(Ilinniartitaanermut, Kultureqarnermut, Iisimatusarnermut Ilageeqarnermullu Naalakkersuisoq)

Siullermeerinnineq

Inatsisartunut ilaasortaq Sara Olsvig, Inuit Ataqatigiit, Inatsisartut aalajangiiffigisassaatur siunnersuutaanut pillugu Ilinniartitaanermut Naalakkersuisup qutsavigaa.

Naalakkersuisut isumaqatigaat Kalaallit Nunaanni tunisassiat avammut tunisassat siuarsarnissaasa suliniutigineqarnera inuiaqatigiit ineriartornissaat aalajangiisuunerpaasoq. Tamanna isiginiassavarput, ataatsimut isigalugu ilinniartitaanermi inuussutissiornermilu. Tunisassiat avammut tunisassat siuarsarnissaat tunngavilerniarlugu suliamik ingerlatsinermi immikkut ilisimasaqarneq, aallarnisaasarneq nutaaliortarnerullu siuarsarnissaanut periarfissaqarneq pisariaqarput. Tamassuma kinguneraa ilinniartitsissutini inuit ataasiakkaat soqutigisaanni ilinniartitsinissamut pikkorinnerulissasugut. Taamatut soqutisaqarnermi suliamik ingerlatsinermi piginnaasaqarneq ilanngullugu, inuit assersuutigalugu avammut tunisassiornermik isumassarsisut ineriartortitseqqinnissamik periarfissaqarnissaat tunngaviuvoq.

Piffissami sukkasuumik allanngoriartorfiusumi, nutaanik periuseqarfiulersartumi tekneqarfiulersartumilu, inuusuttortatsinnut pitsaanerpaanik atugassaqartitsinissarput pingaaruteqarpoq. Taamaammat ilinniakkat qaffasissusaanni assigiingitsuni, meeqqat atuarfianni, inuusuttunut ilinniartinnit ilinniqaqqiffinnilu aallarnisaasarnerup nutaaliortarnerullu siuarsarnissaanut 2017-imut aningaasanut inatsisissatut siunnersuummi 1,3 mio.kr.-nik Naalakkersuisut immikkoortitsipput.

Inuussutissalerinermi ilinniarterit ineriartortinniarlugit, aalisakkanik tunisassiorfinni ilinniarsimasunik sulisoqarnissamik inuussutissarsiortut pisariaqartitaat iliuseqarfiginiarlugit, aalisakkanik tunisassiorfinni sulisut ilinniarsimannigitsut ilinniartinneqarnissaat suliniutigineqarpoq. Tamassuma saniatigut pitsaassutsimik nakkutilliineq tunisassianillu ineriartortitsisarneq sammillugit "Procesteknikeritut" aamma "Procesteknikeritut immikkut piginnaasaqarfiusutut" Inuilimi ilinniarterit ingerlanneqarput, procesteknikeritut ilinniarnissamik 2016-imi qinnuteqartut arfineq pingasuupput, tamarmillu ilinniakkamik aallartitsillutik. Immikkoortumi ataatsimi ilinniagarpasuit neqeroorutigineqarnissaat

aaqqiissutaasariaqanngilaq, tassa pissarsiviulluartumik ilinniagaqartitsiniarluni holdit naammattumik amerlassuseqassammata.

Ilinniarnerrilli sulit tamatigoortunngortinnerulersinneqassapput suliffeqarfiillu ujartugaat malinneqassallutik. Taamaammat immikkoortumi inuussutissanik ilinniakkat soqutigisaqartut suleqatigalugit ineriartortinneqarnissaannut periarfissat pillugit nassuiaasiornissaq pissusissamisuussaaq, tassungalu tapiliullugu, taakku ilanngunneqareersimanngippata, ilinniartitaanermut periusissiami inerniliinerit ineriartortitsinermullu periarfissat pingaarnerit ilanngunneqassallutik.

Naalakkersuisut taamatut oqaaseqarlutik siunnersuutip akuerineqarnissaa inassuteqaatigaat.